

Calvoren senideei egin itaunketa «gogorra» kritikatu du Monterok

«Juan torturatuta hil zuten», berretsi du hildakoaren arrebak


Juan Calvoren senideek atzo itaunketa «gogorra» jaso izana salatu zuen Txema Montero abokatuak, «batzuetan bazirudielako senitartekoak Calvoren gaixotasuna behar bezala ez segitzearen erantzule egin nahi zituztela». Arkauten hil zenaren hiru anai-arrebek deklaratu zuten atzo.

LUIS KARLOS GARCIA / GASTEIZ

Atzo eguerdian Juan Calvoren hiru anai-arrebek egin zuten deklarazioaren ostean Monterok argiro hitz egin nahi izan zuen. «Eskuarki egindako itaunketez ez dut hitzik egiten», zehaztu zuen senideen abokatuak, «baina gaur esan behar dut oso itaunketa gogorra eta zorrotza egin dietela eta batzuetan ematen zuten senideak beraiek egin nahi zituztela Juan Calvoren gaixotasuna behar bezala segitu ez izanaren erantzuleak».

Izan ere, Eusko Jaurlaritzak eta auziarekin zerikusi duten zortzi ertzainek anai-arreben deklarazioa eskatu zuten, Calvoren harremanaz, gaztearen buruko gaixotasunez nahiz hauen tratamenduaz zekitenaren berri izan nahirik. Jaurlaritzak eta ertzainek Juan Calvoren neskalagunaren adierazpena ere eskatu zuten, baina ez zen atzo egin eta datozen egunetan gauzatuko da.

Monterok aipatu zuen Calvoren senideak erantzule egin nahi izatea «are larriagoa» dela baldin eta Ertzaintza Calvo atxilotu eta senideekin harremanetan ez zela jarri aintzat hartzen bada, horrela atxilotutakoaren gaixotasunaz



Txema Montero Juan Calvoren senideen abokatuak.

OLALDE

✓ «Arazoa are larriagoa da Calvo atxilotzean Ertzaintza senideekin ez zela harremanetan jarri kontuan hartzen bada», esan zuen Monterok.

eta tratamenduaz jakin ahal izango zutelako. «Senideek, aldiz, Ertzaintzaregandik jaso zuten lehen berria Juan Calvoren heriotza izan zela deklaratu zuten nik egindako galderei erantzunez», erantsi zuen abokatuak.

ARREBA: Bestalde, Monterok argitu zuen atzoko deklarazioa ez zela senideentzako

kalteordainaz hitz egitekoa izan. Horretarako lehenik erantzukizuna zehaztu beharra dagoela eta oraindik horretan dihardutela gogorarazi zuen. Jose Miguel Martinez kasu honetako epaileak, berriz, batez ere kalteordainari buruzko kontua zela esan zuen.

Halaber, Purificacion Calvo hildakoaren arrebak hitz gogorak egin zizkien komunikabideei: «Juan torturatuz hil zuten kartzelan eta nik auzia argitzea besterik ez dut nahi, ez dirurik». Calvoren gorputzean zeuden kolpeen arrastoak torturaren frogak zirela esan zuen.

Behin epailearen aurreko deklarazioa eginda esan zuen «dena argitzeko itxaropentsu» geratu zela eta informatu zuen beren amari ez diotela Juan Calvori gertatutakoaz ezer jakinarazi.

Ikastoletako langileen lanuzteak eragin zabalagoa publikatuetan

I.E. / DONOSTIA

Ikastoletako langileen artean ordezkari nagusia duten ELA eta LAB sindikatuek atzarako deitutako ordubeteko lanuztea, Euskal Autonomi Elkarteko (EAE) ikastolen bi herenak egin zuten sindikatuotako iturriek jakinarazi zuten, «irakasleen % 65ek gutxi gora-behera». Lan hitzarmenaren inguruko eztabaida tarteko konbokatuta zuten ELA eta LABek protesta Araba, Bizkaia eta Gipuzkoako ikastola guztietan. Nafarroan duela pare bat hilabete adostu zuten.

«Jaurlaritzako Hezkuntza Sailaren jarrera salatu nahi dugu integratutako ikastoletan», adierazi dute sindikatuotako iturriek, «lan alorrean egin duen eskaintza oso eskasa delako. % 4,5eko soldata igoera besterik ez digute eskaini guri, irakaskuntza publikoko beste sektoreei % 8koa eskaini dien bitartean».

Pribaturako aukera egin zuten ikastoletan, berriz, oraindik lan hitzarmenaren inguruan Ikastolen Elkartea eta Eusko Ikastolen Batzarra patronalarekin adostasunik ez lortzea gaitzetsi nahi izan dute. Soldatak KPI gehi 0,5 igozteza da egin duten eskaera, eta ordutegian 15 orduko murrizketa egitea.

Sindikatuak azaldu dute, publikatutako ikastoletan erantzun zabalagoa izan du lanuzteak: «herrialdeko Araba izan da protesta gehien segitu duena. Publikatutako ikastoletan oihartzun zabalagoa izan du besteetan baino».

Ikastolen Elkarteko ordezkarien esanetan, euren eskumeneko zentroetan irakasleen % 32k bakarrik egin zuten greba, «beraz, uste dugu irakasleagoak ulertu duela gure eskaintza arrazoizkoa dela, azken finean, guk EAEko Aurrekontuen Legeak lagatzen duen adinako eskaintza egin baitugu», azaldu zuten.

Ikasle Abertzaleak-ek greba deitu du gaurko Irakaskuntza Ertainean

BILBO

Ikasle Abertzaleak taldeak greba deitu du gaurko Hego Euskal Herriko Irakaskuntza Ertainean sektore hau «egoera larrian» aurkitzen dela salatzei. Euskal Autonomi Elkartean, Euskal Eskola Publikoaren Legea Irakaskuntza Ertaineko «arazorik handiena» dela uste dute IAKoek. Nafarroan, berriz, «oztopoak» bitarteko falta eta Euskararen Legea direla nabarmendu zuten.

Nafarroako Unibertsitate

Publikoan (NUP) eta Euskal Herriko Unibertsitatean (EHU) garatutako ikasleen mobilizazioen ondorioz, lortutako emaitzak nabarmendu zituzten IAKoek. Aldi berean, Irakaskuntza Ertainak jasaten duen egoera salatzeko hurrengo hilabeteetan egingo dituzten protestaldien berri eman zuten. Hau dela eta gaur greba deitu dute Hego Euskal Herriko Irakaskuntza Ertainean. Era berean, manifestaldiak egingo dituzte gaur eguerdiko hamabietan Hegoaldeko lau hiriburuetan.

Kazetaritza Fakultateko ikasleek erreferenduma izango dute gaur

G. AGIRRE / BILBO

Euskal Herriko Unibertsitateko Gizarte eta Informazio Zientzien Fakultateko Ikasleek Batzarreko erreferenduma egingo du gaur. Erreferendumean, fakultateko partaide guztiek hartu ahal izango dute parte eta honako galdera erantzun beharko dute: «Irtenebide negoziatu baten alde zaude?».

Gaurko erreferendumaren helburua, urteetan luzatzen ari den irakasle kaleratuen auziari Informazio eta Gizarte Zientzien fakultateak irtenbide negoziaturik eman nahi dion ala ez jakitea da. Irakasle kaleratuek Ikasleek Batzarreko proposatutako ekimen hau bere egin zuten bitartean,

EHUko agintaritzak ez zuen onartat eman bide hau eta irakasle hauei Kanpusean sartzea eragozteko erabaki zuen.

Horrela, joan den abenduaren hirutik EHUko Errektoretzak Leioako Kanpuseko sarbidea eragotzi die sei irakasle kaleratuei. Azken hauek, Kanpusean sartzea lortu duten aldi bakoitzean kanporatu egin dituzte Ertzaintzak edota zinpeko goardiek. Ondorioz, euri edo eguzki egin, irakasle kaleratuek Bizkaiko Kanpuseko sarreraren enkartelatzen dira egunero zortzi bederatziraino. Ekintza honen bidez, irakasleok beren egoeraren berri eman eta EHUko agintaritzak erabakitako neurriak salatu nahi dituzte.



Unibertsitate atean biltzen dira egunero irakasle kaleratuak.

XOUSE SIMAL